



MAJLIS PERUBATAN MALAYSIA
KEMENTERIAN KESIHATAN MALAYSIA
ARAS 2, BLOK E1, KOMPLEKS E, PRESINT 1
PUSAT PENTADBIRAN KERAJAAN PERSEKUTUAN
62518 PUTRAJAYA

Tel : 03-88831400
Fax : 03-88831406
Email : admin@mmc.gov.my
Website : <http://mmc.gov.my/>

KENYATAAN AKHBAR

PENGUNAAN NAMA PENUH DENGAN NOMBOR PENDAFTARAN DIBAWAH AKTA PERUBATAN 1971 OLEH PENGAMAL PERUBATAN BERDAFTAR DI DALAM URUSAN RASMI

OLEH

**Y. BHG TAN SRI DATO' SERI DR. HJ. MOHD ISMAIL MERICAN
YANG DI PERTUA, MAJLIS PERUBATAN MALAYSIA**

13 NOVEMBER 2008

1. Pada masa ini, penggunaan gelaran 'doktor' atau singkatan 'Dr.' pada awal nama begitu berleluasa sekali.
2. Selain perubatan, graduan dari beberapa bidang pengajian lain seperti veterinar, pergigian dan juga doktor falsafah juga turut menggunakan gelaran 'Dr.' tersebut.
3. Sejak kebelakangan ini, 'graduan' dari beberapa bidang pengajian di dalam dan juga luar negara yang diragui kesahihannya juga turut menggunakan gelaran 'Dr.' bagi menjalankan pelbagai aktiviti licik. Bagi menyukarkan dikesan pihak berkuasa, mereka menggunakan pelbagai singkatan nama.
4. Gejala mendorong orang lain mempercayai bahawa beliau adalah seorang profesional yang berdaftar dan berkelayakan untuk mengamal bukan sahaja ujud di dalam dunia perubatan bahkan la melibatkan semua profesion.
5. Bagi membendung penyelewengan sebegini, sesetengah profesion mewajibkan setiap ahli yang berdaftar menggunakan nombor pendaftaran di dalam semua urusan rasmi.
6. Seksyen 32 Akta Perubatan 1971 menetapkan penggunaan istilah tertentu oleh mana-mana individu sehingga boleh mendorong seseorang mempercayai bahawa beliau seorang pengamal perubatan yang berdaftar adalah salah.
7. Antara perkara yang ditakrif boleh mendorong seseorang mempercayai individu tersebut pengamal perubatan berdaftar digariskan dibawah seksyen 33(1)(a) hingga (c) Akta Perubatan 1971 seperti berikut:

1) Seseorang yang tidak didaftarkan atau tidak dikecualikan daripada pendaftaran dibawah Akta ini yang-

(a) bersengaja dan dengan palsu berpura-pura sebagai didaftarkan di bawah Akta ini atau sebagai berkelulusan menjalankan amalan perubatan atau pembedahan; atau

- (b) *bersengaja dan dengan palsu memakai atau menggunakan nama atau titel seorang tabib, doktor, doktor perubatan dan pembedahan, sarjana muda perubatan dan pembedahan, doktor bedah, pengamal am atau tukang ubat; atau*
- (c) *bersengaja dan dengan palsu memakai atau menggunakan sesuatu nama, titel, tambahan atau perihal yang memberi faham bahawa dia adalah didaftarkan dibawah Akta ini atau bahawa dia diiktiraf di sisi undang-undang sebagai tabib atau doktor bedah atau siswazah perubatan dan pembedahan dalam perubatan atau seorang tukang ubat; '*

8. Seksyen 33(2)(a) pula menjelaskan:

'(a) pemakaian atau penggunaan oleh seseorang akan perkataan 'doktor' atau 'klinik' atau 'dispensari' atau 'hospital' atau sesuatu perkataan yang bersamaan dengan perkataan itu dalam sesuatu bahasa lain berhubungan dengan menjalankan amalan perubatan atau pembedahan hendaklah disifatkan sebagai pemakaian atau penggunaan akan sesuatu nama, titel, tambahan atau perihal yang dimaksudkan untuk mendorong seseorang mempercayai bahawa dia berkelulusan menjalankan amalan perubatan atau pembedahan mengikut kaedah-kaedah sains yang moden. '

9. Seksyen 35 Akta Perubatan 1971 menetapkan penalti bagi mereka yang sabit kesalahan mengeliru orang ramai melalui penyalahgunaan atau pemakaian nama atau titel 'Dr.' seperti berikut:

- '(1) (a) bagi kesalahan pertama, didenda tidak melebihi dua ribu ringgit; dan*
- (b) bagi kesalahan kali kedua atau kali kemudian, didenda tidak melebihi lima ribu ringgit atau dipenjarakan selama tempoh tidak melebihi dua tahun atau kedua-duanya;*
- (2) Berkenaan dengan sesuatu kesalahan yang berterusan orang itu boleh dikenakan penalti selanjutnya sebanyak lima puluh ringgit bagi tiap-tiap satu hari kesalahan itu diteruskan sebagai tambahan kepada penalti di bawah subseksyen (1) (a) dan (b) itu masing-masing. '*

10. Seringkali, Majlis Perubatan Malaysia (MPM) dan Kementerian Kesihatan Malaysia (KKM) menerima pertanyaan berkaitan kesahihan sijil cuti sakit dan laporan perubatan serta pendaftaran pengamal perubatan. Namun, ekoran ketiadaan nama penuh serta maklumat lain individu berkenaan, pengesahan tidak dapat dilaksanakan. Ini bukan sahaja menjejaskan imej dan kredibiliti MPM, ia jua menyulitkan pemohon maklumat tersebut.

11. Penyamaran dan penipuan ini juga mendatangkan pelbagai implikasi negatif. Selain pelbagai kemudaratan dan kesengsaraan kepada orang ramai, kewibawaan pengamal perubatan berdaftar menjadi tergugat, kualiti perkhidmatan kesihatan akan merosot, penjagaan kesihatan orang ramai dan industri kesihatan pelancongan negara akan terancam. Seterusnya, dikhuatiri keadaan ini akan memberi impak tidak baik kepada kesihatan rakyat dan ekonomi negara.

12. Menyedari keperluan membendung gejala sebegini dari merebak, MPM yang bersidang pada 10 September 2008 lalu memutuskan semua pengamal perubatan yang berdaftar penuh perlu menggunakan nama penuh serta memasukkan nombor **Perakuan Pendaftaran Penuh** di dalam semua urusan rasmi berkuatkuasa **01 Januari 2009**. Ini merangkumi penggunaan cop nama dan kad panggilan.

13. Bagi pengamal yang hanya berdaftar sementara dibawah seksyen 16 Akta Perubatan 1971, mereka boleh menggunakan nombor **Perakuan Amalan Sementara**. Namun, mereka masih perlu menggunakan **nama penuh**.
14. Bagi pengamal perubatan yang belum berdaftar penuh, mereka boleh menggunakan nombor **Perakuan Pendaftaran Sementara** semasa menjalani latihan siswazah dan mereka masih terikat menggunakan **nama penuh**.
15. Berdasarkan nama penuh dan nombor pendaftaran seseorang pengamal perubatan, orang ramai boleh mengesahkan pendaftaran mereka dengan melayari laman web MPM di alamat: <http://mmc.gov.my/> bahagian **Medical Register**.
16. Diyakini pendekatan sebegini akan dapat mengurangkan gejala penyamaran dan penipuan oleh individu yang tidak berkeelayakan dan bertanggung-jawab mengguna gelaran 'Dr' bagi menjalankan pelbagai aktiviti licik.
17. Orang ramai boleh mendapatkan nombor pendaftaran dari pengamal perubatan yang merawat mereka.
18. Justeru itu, adalah menjadi kewajipan semua pengamal perubatan berdaftar untuk menggunakan nama penuh dengan nombor pendaftaran dibawah Akta Perubatan 1971 di dalam semua urusan rasmi berkuatkuasa **01 Januari 2009** bagi sama-sama membanteras penyalahgunaan gelaran 'Dr' oleh individu yang tidak bertanggung-jawab.

Sekian. Terima kasih.

Yang Ikhlas,



(TAN SRI DATO' SERI DR. HJ. MOHD. ISMAIL MERICAN)
Yang Di Pertua.

Tarikh :13 November 2008.